

四庫全書

史部

欽定四庫全書

史部

廣西通志卷八十七

詳校官給事中臣鄧文泮

檢討臣德生覆勘

總校官進士臣

朱鈐

校對官編修臣

盧遂

謄錄監生臣

王元愷

欽定四庫全書

廣西通志卷八十七

方伎

仙釋附

農圃醫卜聖人不廢其為道雖小猶切於民生日  
用而非虛無怪迂之說可例也粵西如蕭時亨之  
醫盧道者之卜謂與倉跗管郭有間乎人即不能  
務為明體適用之學而一藝成名寧得以無用目  
之至若勾漏丹砂服之尸解慧師委蛻長寄湘山

粵中仙釋亦有指不勝屈者志方伎附仙釋

盧道者精於卜後唐同光二年有郡倖因婦孕歲  
餘不產求盧卜之書一醋字不踰月二旬有一日  
酉時娩倖以為神建塔居之及宋乾德間坐化遺  
詩云三十年前賣卜化得一間茅屋未云撒手永  
超三界一去定無反復寺塔在義寧縣明崇禎元  
年重修

雷隱翁名本宋時馮翊人先世客湖湘因家於全



翁嘗登進士棄去終日默坐或曰癡甚答曰癡猶  
勝黠作詩妙發元音一日以醫術授其子國伸曰  
汝盍盡心於此遂出遊不返元祐間有朝士闕姓  
者遊羅浮見一人坐松下神宇軒秀異之問何許  
人答姓名則翁也且曰他日過湘源可訪吾子孫  
有詩百篇味之當有得乃指以歸路俄頃至家後  
為廣西計官道全訪之得曾孫鑑錄詩三十首因  
白於帥用鑑為廉州醫官

賓公逸其名宋時嘗遇異人授白鶴青鳥術尋龍  
穴砂水若犀照然留記示後世徃徃奇中雖載籍  
失考而各處記地皆賓公所遺楊松筠過昭州見  
賓公曰粵有人矣遂度嶺而去蓋地術中之有道  
眼者

韓生桂林人性嗜酒自云有道術人初不聽一日  
欲自桂入閩同行者俱止郊外僧寺韓生夜不睡  
抱一籃持匏杓出就庭下衆徃視之則以杓酌取

月光作傾瀉入籃狀咸戲之曰子何為乎韓生曰  
今夕月色殊難得我懼他夕之風雨儻夜黑留此  
待緩急爾衆笑焉詰朝諦視空籃敝杓如故衆益  
哂其妄及舟至邵平坐江亭上各命僕辦治餞膳  
多市酒期醉會大風至日暮益亟燈燭不得張坐  
中不辨眉目衆悶甚一客忽憶前事戲謂韓生曰  
子所貯月光今安在不可用乎韓生撫掌曰我幾  
忘之即狼狽走於舟中取籃及杓一揮則月色燎

焉見於梁棟間連數十揮直如秋中晴夜月色潏  
灑毫髮皆鑒衆乃大呼痛飲達四鼓韓生復以杓  
取而收之藍夜黑如故一時嗟異

梁大用蒼梧人嘗遇異人授以三鐵針并針灸書  
法遂為名醫明永樂中郡守羅觀訪其家止存一  
針進於朝

藤縣程二者谷山土著得異術坐一鳧以渡鬱水  
遇孕婦其術不神遂沉溺屍逆流附岸坊人立祠

祀之

黎鯨藤縣人少補學官弟子不屑與世競名隱於醫狀若不勝衣蹈履循循如婦人女子至切衄五臟癥結無不洞見時有副使召視疾見鯨狀少之鯨乍按即得其實乃大驚起謝不再劑而疾愈他皆類此年踰六十始得子八十後步履猶不減少時益深得養生之術者

余道人不詳其氏家劍峯石下自幼入道士巖事

黃庭經精巫術嘗以口呪桃符治病病立愈禱雨  
逐疫咸應如響年九十餘無病而逝

黎兆選廣東德慶人好遊咏山水賀縣三峯委徑  
石形像蛇能祟人過之常被噬選題詩蛇舌云徑  
名雖委實平亨鳥道今堪駟馬橫不是武城偏捷  
路青天白日任君行蛇怪遂息居聶峯塘塘有一  
井形似蟹眼水高於塘水者二尺味甘美人咸稱  
其有神術云

文繡字仲著武緣人讀書高尚有隱德寓意岐黃  
濟人頗衆族里重之

蕭時亨字如步臨桂人初業儒每以濟人為念遂  
棄舉子業攻岐軒術素問靈樞諸書實能精研其  
奧凡遠近求藥者不計利與之藥立瘥庭訓最嚴  
其弟及子若姪登鄉榜者三人年九十四無疾而  
終

常義遠恭城人性厚重不假緣飾精醫術多活人

不索謝及歿之日童叟無不涕零後子孫相繼掇  
元魁人以為隱德之報

何侯者相傳堯時人隱蒼梧山至夏時已二百餘  
歲上帝賜藥一器家人三百餘口拔宅上昇為太  
極真人今疑山有何侯廟

張道陵字輔漢漢留侯八世孫光武十年生會稽  
天目山善以符治病隱於富川之白霞修煉至桓  
帝永壽元年往雲臺峯白日飛昇人即其地祠之



曰丹霞觀丹竈藥曰至今存焉宋范純仁謫賀縣  
東坡與書云丹霞觀張道陵遺蹟果有良藥異事  
乎益指此

真媼漢時人幼寡煉丹都嶠山採薇以充食日久  
坐化於巖歷歲月骨皮尚存因名婆巖同時有陀  
嫗者好施齋久亦坐化於巖二巖因以得名

董奉字君異侯官人居廬山得仙術蒼梧士燹病  
死已三日奉以藥一丸用水調灌之并搖其首少

頃目即開手足漸能動半日起坐四日遂言語如常

董京字威輦晉元帝時避居橫州登高嶺秋夜泛舟於江滸一仙乘槎而來枝幹扶踈黑光照人京謁之賜以血食宋紹定間郡守張垓因構仙槎亭於上

葛洪字稚川句容人家貧好學伐薪貿紙筆且抄且誦以儒學名尤好神仙導養之法吳時洪從祖

元學道得仙號葛仙翁以術授弟子鄭隱洪就隱  
學悉其法又師事南海太守上黨鮑元妻以女授  
內養術太安中石冰作亂吳興太守顧祕檄為都  
尉討破之遷伏波將軍洪見天下已亂乃叅廣州  
刺史嵇含軍事含遇害始還鄉里元帝召為丞相  
掾以平賊功賜爵關內侯不拜咸和初選散騎常  
侍領國史洪固辭聞交趾出丹砂求為勾漏令帝  
以洪資高不許洪曰非欲為榮以有丹砂耳帝從

之乃入羅浮山著書自號抱朴子世以為尸解成仙云

羅秀不知何許人好談玄嘗曰天下有長生不死之藥何不修之時聞葛洪寓羅浮山即棄家往久之慨丹不成復於宣化青山崗巖中修煉一日危坐尸解而去後人名其巖曰丹巖閱數年人有見秀於龜石上與一仙人笑且語遺四足迹於石僉事鄔閱為刻其石曰駐仙石

何尊師不知何許人唐龍朔中居衡嶽不顯名氏其顏若四十歲人行步如風往來蒼梧五嶺間來無所慕去無所歎至百數十年人嘗見之狀貌不改人問氏族但云何何或詰其鄉里及修煉亦云何何時人因號曰何尊師

尹氏女全州人性不事鉛飾居一小洞煉丹大厯二年上升後人於所居紫潭上建尹氏觀至今丹竈存焉

蕭靈護字天祐廬陵人也年十五好道術遇至人  
傳金液丹胎息周訪名山唐貞觀五年泝瀟湘居  
招仙觀創尋真閣於桂州鑄銅鐘一口重五百觔  
歸觀凡五更不敢叩擊恐驚地神故也後選幽勝  
煉丹尸解去宋太宗端拱末觀中於五更初忽聞  
鐘聲衆皆驚訝起視之鐘破裂不旬日有道人以  
掌心鎔銅汁就其裂處模之起紅燄視者方敬憚  
道人入溪洗手忽失所在其鐘至今有模迹

日華君月華君唐乾寧中臨賀令鄭冠卿赴調止  
桂林步棲霞洞遇二道士揖俱入坐石上相與對  
飲奏樂飲已將辭去各贈以詩詩成道士曰方今  
四海鬪爭諸雄角立重斂瞻兵蓋亦天數王喬許  
遜之徒皆棄官即升道果汝其勉之出見二樵問  
洞中酒樂何如汝識之乎乃日華月華君也行數  
步已失所在冠卿遂絕名利退依馮乘壽至一百

四歲

衡山道士軒轅彌明者不知何許人在衡湘間九十餘年善捕鬼物囚繫蛟螭虎豹人莫知其壽嘗過八桂堯廟有題墨在焉後人刻諸石

陸禹臣字服休河東人避黃巢之亂入南嶽遇道士軒轅彌明授以仙術且謂曰子得道當在山窮水絕處乃跋涉隱宜之北山嘗過吳生家生每往謁輒與語塵外理贈生以詩曰世俗風波險人情巧智長要知安分處修性本真常又贈云露下瑤



簪濕雲生石室寒星壇鸞鶴舞丹竈虎龍蟠塵世  
人情窄壺中景界寬憑君高著眼物外試回觀因  
與登覽遍大小巖穴凡二十所遂居巖修煉不復  
出嘗手植異桃靈藥至今不凋山上有井水色紺  
碧異常禹臣在時時聞仙樂一日仙昇吳生拜泣  
求度禹臣曰汝仙籍無名未可也

緱仙姑長沙人也入道居衡山年八十餘容色甚  
少徙居湘南唐相國文昭鄭公畋自承旨學士左

遷梧州特遇姑姑謂文昭曰此後四海多難人間不可久居吾將卜隱九疑矣言訖遂去

女道姑唐時人於永寧雙瑞巖修煉巖有石釜每日出米三升適有老僧至以米不敷鑿其釜得米三十六升後不復出道姑饑餓死忽一棺漂至侍女扛入棺內覆以石獐民疑有異物欲開之倏然雷雨大作因止其棺半覆於石石牀石釜猶存監殿仙師陶克忠宋時平樂人其妹適譚氏生二

女白日飛昇克忠躬耕望雨甚切二女忽至曰飯  
我即雨飯畢果雨克忠隨亦羽化洪武間立廟祀  
之

譚氏二仙女平樂人端平間

一作五代時

家於樂山里

鮐塘村之誕山繼母不惠備極苦楚因修黃老術  
一旦羽化嘗飛矛於誕山之原人立祠以祀每歲  
早有禱輒應

甘陸象州人有志畧時柳州為南漢所據詔陸出

征每以術得捷拜護國將軍及歸里禍福處先知如神州人立廟祀之

甘田象州人家富好施貧而告者未嘗少吝性靈異決禍福無不奇中一日聚鄰里告曰吾厭世矣示衆以修身事言訖瞑目而逝鄉人設廟像祀之後封惠濟感應侯元加封孚應惠濟聖公明加封王號

何鄰不知何許人五代時壽百餘歲有道術隱思

恩之思鄰山後不知所適

黃道人五代時隱思恩山中修煉山因之得名曰

黃道山

莫公失其名後周時人也別號爽朗道人居昭  
州之富川縣七歲辭母入石巖中跏趺靜坐卒莫  
窺其所為年二十自謂能空明寂滅居人相率向  
巖外一夕俄不見皆以為翀舉云

于道士象州人宋乾德間隱西山巖修道白日飛

昇

獨傲仙女象州六村人宋乾德間傲氏與嫂獨孤氏赴天蓋山採葛飲泉見雙鯉戲水取之墮泉中獨孤氏救之亦墮經月餘乃於空中呼父母曰吾仙女也有過謫人間數滿當還象人因名其山曰獨傲山

七仙女不知何代人隱於興隆土司七首山學道後仙去

石仲元桂人號桂華子為道士住七星山工詩宋  
天禧中將歿謂門人曰昨夢得句云地連錦野東  
西去水接朱川次第來此吾有生之患榮謝當然  
未喪之文子其嗣之盡出平生所作詩三百餘篇  
授之曰凡吾所得子之所知必傳之浹旬而歿有  
桂華集

馬知章藤州鐔津人也為道士獨持道德南華兩  
經曰真宗在此同邑契嵩重之嘗銘其所贈硯目

為道交

安昌期恭城人少舉進士皇祐間為橫州永定縣尉以事去遂不復仕遇海豐令胡濟餘結紙為數紐覆之以器因叱之其器遂動徐啓其覆俱化為鼠飼以飯咀嚼如真鼠既又叱之復覆以器而紙結如舊常上山採藥食之吐出其津膠葉如膏治平乙巳携一童往峽山廣慶寺謂寺僧曰久聞此山有和光洞故來一遊遂與俱往凡數日不返僧



求之莫知所在惟石室間有詩云蕙帳將辭去猿  
猱不忍啼琴書自為樂朋友孰相携丹竈非無藥  
青雲別有梯峽山余暫隱人莫擬夷齊後題前橫  
州永定縣尉安昌期筆

武志士來賓人修煉於武神山每出赴齋供即架  
青布幕為橋去五七里遠至市廛人見而奇之越  
數年道成宋元祐初白日上昇

鼇山道人明道中嘗卧州學士人叱之曰莫欺閒

客也會作詩士人授紙筆吟曰家住鼇頭最上山  
偶將蹤跡到塵寰不妨名利場中客忙者自忙閒  
自閒出門不知所之 案鼇山在慶遠府城東南  
二里

棲霞洞道士宋嘉祐時桂州一人入棲霞洞燭滅  
不得出明年乃與遊人俱還自言嘗見數道士相  
謂曰知至道者天不殺服元氣者地不滅因誦此  
故生衆方驚異後輕舉莫知所在

劉景字仲達桂州人初為屠後為商嘗販私鹽遇  
方士與劇飲授以片鉛能制銅鐵為金詰朝失方  
士所在景自是遊方外至京師館賈相昌朝家二  
十年冬夏一裘終日不食飲酒大笑旁若無人所  
談老莊周易皆臻玄妙皇祐中還家容色如少年  
而妻已皓首人皆異之乃棲南溪山石室中妻孥  
徃省至則有毒蛇猛獸不能進嘉祐時運使李師  
中訪之贈以詩元豐八年九月召其子謂曰死便

火我其夜無疾而卒年一百十八歲舉火燃棺時  
棺忽自啓中惟布袍條履存焉後百餘日廉州合  
浦還珠驛得其所致家書乃知景羽化里人名所  
居曰劉仙巖

歸真子真仙觀之道人也桂州唐子正讀書觀中  
與道人善授方書宋治平初子正領薦赴京至全  
州僕病不能行忽遇黃冠乃道人也笑謂曰吾為  
先生僕可乎遂荷擔行如飛別去月餘子正卧病

湖陽驛道人留書驛吏視其緘題云呈桂州唐秀才歸真子謹封發書則惟一詩云元山相見又之全不遇先生道未緣大抵有心求富貴到頭無分學神仙篋中靈藥宜頻施鼎內丹砂莫妄傳待得角龍為燕會好來黃壁卧林泉子正大驚而結語未能喻後為邕管機宜攝倖事熙寧丙辰交賊陷城遇害死於州治黃壁亭角龍蓋指丙辰也歐陽闢為撰唐少卿遇仙記

邵道士字彥甫蘇軾送邵道士歸都嶠洞天詩云  
乞得紛紛擾擾身結茅都嶠與仙鄰少能寡欲顏  
長好老不求名語益真許邁有時還學道陶潛無  
酒亦隨人相從十日還歸去萬劫千由結此因又  
耳如芭蕉心如蓮花百節疏通萬竅玲瓏來時一  
去時八萬四千此義出楞嚴世未有知之者也元  
符三年九月二十一日書贈都嶠邵道士

羅隱江西泰和人宋時常隱於興隆之都陽旗強

二山後仙去今猶有題刻遺跡

羅仙宜山人嘗牧牛於會仙山下一日遇一老翁以水一勺飲之覺身輕舉步如飛後遂仙去

賀州道人為顏持約客持約名博文建炎中謫官賀州好延方士道人敝衣大冠數過顏顏輒出酒飲之他日邀顏於城外十里許入深山同坐石上謂顏曰偶獲名酒同公一醉袖出瓢取兩杯共酌各飲十四五計瓢纔受升餘而終日不竭顏異之

起再拜道人曰子可教即取書一編授顏乃圭峯  
所註周易參同契也

梁賢植梁之德容州西南隅望山坊人賢植年二  
十三之德則長一歲隆興甲申四月同遊都嶠山  
攀蘿而上抵山巔梵宇三楹閒無僧尼惟神像鐘  
魚而已山泉清冽樹有一桃如人食其半者取而  
分啗之味異常凡氣頓減比歸不復粒食容色紅  
潤大異昔年惟背微偃僂鎮帥程召置空室局其



戶數日如故始信而禮之辭家遊蜀莫知所終

周師慶五羊人宋開禧中煉丹於邕之伊嶺巖中  
後人名曰望仙巖石刻碑銘尚存邕州安撫王侃  
有詩

陳楠字南木號翠虛惠州博羅人以盤櫬種桶為  
生浮沉世俗莫有知者後得異術嘗之蒼梧適遇  
郡禱旱人憂暵死翠虛乃執鐵鞭下淵潭驅龍起  
須臾陰雲四合雷雨交作境內霑濡遂為豐年又

行欽管道中遇羣盜拉殺瘞之後三日盜散復甦  
遊長沙衝帥節執拘送邕州去數夕又回長沙其  
靈異如此寧宗嘉定六年尸解去

吳優字世遠宜山人初業儒後為州吏遇異人授  
一杖欲有所往携之頃刻即至家居疊石村去郡  
治三十餘里每日昏暮歸家昧爽在郡人皆異焉  
一日郡守因事訶之拂袖謝去逾夕而終時宣和  
間也葬之日舁櫬至桃源山扛索忽斷舉之不動

俄頃螻蟻皆銜土蓋棺成一巨塚且露一角百餘年尚完好如新鄉人因立廟祀之賜額曰顯應後時著靈迹紹定五年又上其事加獎靈正侯

盧仙宋時人失其名偶之崎嶇樵採遇一仙盤桓片時出山已三歲矣後遊都嶠不還時有見之者童顏如昨邑人為之立望仙坊

盧六者上林人性不食肉一日往樵大明山見二白衣童子變幻可駭因謂曰汝且去更十日可來

授汝道如期而往端坐石上無言而化鄉人以為尸解又有莫四者亦傳坐化於大明山崗

崔莫二仙姑不知何許人宜州城北有會仙山由丹流閣而上崖百尺石崗一區其半是二仙煉丹處中有丹竈石蓬皆作金碧色光彩燦然蓋丹火燠爍也竈後即二仙卧所頭臂股脰兩形畢現深入石寸許崖峭深人罕躡者至必香楮默禱之力方能緣焉不則惟望歎而已

居思娥住思巖山在貴縣南七十里人入山恒見之不知名姓世代問之則曰此山中人人號之曰思巖異人山多奇花異果味與常別取懷之輒迷不得出

杜應然宋武林人隨父宦遊流寓廣西專心慕道寄迹黃冠中遍遊天下名山嘉定間始來融州

張自明建昌人宜州教授攝州事後授知州風流文雅宦蹟多可紀者一日集士民謂曰吾將入關

矣士民隨之詣九龍山入一洞奇香綢靄光景殊  
別有石碑題云宋刺史丹霞張公之墓鏤磨宿構  
公飄然而入浮雲乍擁洞口漸合今其洞門僅容  
一人側身可進又案府志九龍山註云刺史張自  
明卒昇棺過此石開自合

蔣暉全州道士志行高卓洞賓謁之適蔣他出題  
詩於壁曰醉舞高歌海上山天瓢承露浴金丹夜  
深鶴透秋空碧萬里西風一劍寒後書無上宮主

訪蔣暉作遂去蔣歸大驚曰宮字無上此呂翁也  
追之不復得矣

莫道人者容州人居石崗入山不知幾年問之亦  
自不言歲數山下父老有八九十歲者言自小已  
見其丰姿容貌鬚鬢不異於昔精力甚健登山如  
飛不避寒暑蕭然一菴傍無侍者嘗夜坐於飛雲  
頂石巖間有虎侍傍達旦乃去貴宦遊山求見之  
多不遇遺之詩者不一宋理宗末年猶在

呂仙即呂純陽嘗憩梧山郡人因構呂仙亭元天  
歷間疫大作有張彥才者夢一道士入其家求庭  
前樟樹為呂仙像彥才許之明旦風拔樹置亭下  
疫遂息元末像左指間生靈芝一本狀如蓮花馨  
香襲人明嘉靖間芝又生於亭碑

李龍者元至正間興業大李村人事修煉術偶携  
妻訪外家酣飲還途中謂妻曰體中燥痒不可忍  
會須過前溪一浴而姑待於此有頃風雨驟作妻



趨視之則遍身鱗甲矣囑曰我歲一來歸當以米糕祀我遂化龍去每歲果一還還則雨足稼豐鄉人呼其居曰李龍宅

龍道人元末結廬平樂走馬坪環植以竹明洪武二年通判夏天啓訪之贈詩云竹木森森畫不如懸崖峭壁一茅廬人生若識玄機妙須向禪關覓太虛後六年積薪自化

姚道士號清溪賓州人明洪武十三年於龍虎山

學道常騎虎遇旱禱雨如注南寧孽龍作祟當事  
馳迎頃刻而至斬孽龍太守廟蛇精食人復殺之  
後白日飛昇

歐陽碧潭平南秦川里人永樂初遊江西龍虎山  
求道張真人鑑其誠慤授以祕術能役神鬼風雷  
貴縣旱縣尹命歐陽至澍雨大沛尹所錫賚辭不  
受遇事能前知後仙去有廟祀之

何璘賓州人恬淡輕名利採藥茹芝至天順年二

百三十餘歲飄然不知所適人咸稱為羽化

鄧清字子真明正統間羽士也居岑溪習瑜珈教  
得異傳一日雷擊物遇穢墮地清為呪灑水淨之  
雷遂飛昇遷居善村常遊聚仙峯頂羽化之日棺  
為風雨飄去置石中鄉人立祠祈禱輒應

文志矩紫極宮道士先以採藥為業年四十一歲  
始出家遊武當龍虎諸名山妙契符籙之術其應  
如響天順間無病卒次日有見志矩者謂其人曰

吾宮今日奏醮可送麵至今晨失一拄杖在某處  
亦可令人送來其人詣宮果然始知志矩乃尸解  
去

全用誠靈川人少隨父入蜀娶於蜀生二子一日  
遇異人授以仙術會父卒即扶櫬歸事母最孝及  
母死即傾家所有畀妻子令歸母家結菴於北障  
山中名如佛嶺嘗夜行山頂誦經虎豹皆伏客來  
尋訪所遺物自某地來悉能知之持行二十餘年

立化不仆弟子葬北源山中

宋真人宣化宋村人也嘗駕一龍頃刻取生椒為魚膾書符咒能逐疫激雷道家之靈寶懺書傳言皆其創筆

王真人不知何許人明景泰間謫戍馴象衛有道術能致雷雨以手書符篆於人掌中人握之行數步望其方開手則雷轟然而起歲旱有司祈雨連日弗應真人曰開屠撤壇某日某時請迎雨至期

日益酷烈真人書符篆焚之向空叱咤擊令木雷  
雨交作平地水深三尺有衛姓者家有妖魅往治  
之妖忽啼竄急書符焚之震雷忽起則妖為老猴  
已擊死於登高嶺矣後羽化去

李子長懷集人遨遊羊城間放浪不羈師新會陳  
白沙及歸白沙送以詩云春擢去江門泝流焉汲  
汲點筆烟外山歸來看懷集又勸其謁張太守詩  
云不聞端別駕敬士如子長問道蒼梧下登歌刺

史堂其後或往或來蹤跡奇幻相傳以為仙去

李賤子融縣人

舊志作永淳人

幼孤育於陽氏長傭於龍

家性善卧田野不治龍氏責之賤子結草為人為牛置田間一日而耕犁蒔插俱遍龍懼遣歸為人却邪祛疫不假符呪立驗年八十餘卒葬時舉棺甚輕妻覃氏亦有異術後二載卒遺有草書數十字類符篆邑人奉之者不食牛肉

馮克利貴縣東學村人嘗往北山採香遇八仙對

金史卷八十七  
奕分得仙衣一襲無縫線痕及回則子孫易世矣  
聞之官赴省勘問將克利與僕馮遠覆洪鐘內繞  
以薪焚之及啓則克利坐而馮遠已灰化矣遂信  
為仙表聞勅封遊天得道三界比回至蒼梧江口  
遂羽化

蔣興灌陽人早中鄉試不仕隱於仙源洞修煉不  
知所終太守顧璘嘗訪其洞得興故棲石題詩云  
水曲桃花岸靈巖信有仙蟲書留古洞鶴駕去何



年白犬眠金竈蒼龍飲玉泉  
媿非嵇叔夜來此竟空還

池道澄朝元觀道士年十九  
一日晚飲酒數壺語其徒曰  
吾當今夜丑時一刻別人間  
矣沐浴衣冠至丑而逝

黃德環武宣落庫村人嘗上  
雙髻山採香遇神授一斧回  
即神通騎一黃牛出入邑里  
俱為立廟姚二仔崇禎間人  
生不如童年十五登火焰巔  
架

片蓬種菜芋充腹所居有池畜二鯉旁有桃熟而  
取啖值旱司李唐邦教延至印山亭禱雨不食烟  
火著人立表河邊限以尺水坐至次日果雨三日  
河水盈尺即止謝以金不受還山後數日覓之則  
僅片蓬而已

明末有樵者嘗入藤帽山得異境儼如洞府歸語  
里人咸曰此必仙人居也丙子旱魃為災里人就  
之求雨立致滂沱一時傳聞郡邑凡附近鄉村及

鄰邑來禱無不應詢其所禱何神則曰石盆洗臉  
仙姑

馮吉貴縣人克利九代孫

國朝順治己亥得道後不知所之鄉人為之立祠

道林唐調露中桂州人薛甲嘗供一僧法號道林  
道德甚高瞻敬尤切如是供給十有餘年忽一日  
辭去云貧道在此撓瀆多年更無所酬今有舊經  
一函且寄宅中一周年不回即可開展經歲餘開

鎖見有金數千兩後賣一半買地造菩提寺并建  
道林真身供養至今見存薛甲有孫禹賓在桂林  
效職見桂林風土記

惠能禪師謁黃梅五祖祖囑速去曰逢懷則止遇  
曹則藏唐武則天朝說法講經於永寧州南雙瑞  
巖永福知縣叩其行止荅曰僧修於此不知花甲  
但覺時寒時暑草木盛而復衰惟記入山之年乃  
某年某月也數其歲次已四十年矣武后徵召不

赴後往曹溪世稱六祖又嘗往懷集上愛嶺峯頂  
石室棲遲人稱六祖巖

全真姓周氏號宗慧柳州人父鼎尚書母熊氏唐  
開元十六年生幼叅徑山禪師即自立禪闕昕夕  
跏趺不間寒暑遊羅浮歸省其母母設雞黍食竟  
趨至江潯出腸洗之至德初遊湘源創居湘山一  
日謂徒衆曰大劫將至可易衣冠未幾武宗詔汰  
緇流無漏網者惟其徒獲免永州刺史韋宙遣使

迎四門各見其入莫知孰為真者其他變幻不可  
殫述咸通八年二月十日端坐逝年一百四十歲  
遺蛻在湘山寺妙明塔歷代謚為慈祐寂照妙應  
禪師又謂無量壽佛

白鹿禪師桂人姓張名元康襁褓已能合掌趺坐  
長祝髮龍泉寺嘗歸省親登陽龍山頂樂之自號  
陽龍野人住京兆大興寺開元初明皇幸安國寺  
召利涉法師修經時緇徒雲集勅內侍諭衆有明

上乘者闡揚無隱師前奏曰臣願演玄旨命與利  
涉對問旨意詳明明皇嘉嘆賜住持安國寺明年  
駕復幸時集沙門凡五百人以外國所貢白鹿示  
之鹿到師前跪伏遂以鹿賜之號白鹿大師開元  
末丐歸復居陽龍大興佛刹名其寺曰白鹿

信天大師桂人姓胡名法壽始出家為頭陀能飲  
油雖巨鉢引滿無苦也俗呼為喫油道者時有中  
貴南使見而異之還奏僖宗詔詣京師人見不肯

削髮以為受之於親不忍去從之忽云天下將有  
叛者起惟蜀可避再奏不納師乃自往俄黃巢反  
僖宗西狩遂以為神從駕還京賜號鎮國屢辭不  
受復賜信天大師

楊岐乘廣者容州人張氏子七歲學書十三慕道  
至衡陽依天柱入洛謁荷澤會契真乘由是南反  
中經楊岐一見峯巒賞其奇秀謂可開築遂成道  
場踰嶺以北涉湘而南法侶望山如趨鷺嶺



虎鹿二禪師寓居橫州寶華山寺修道聚徒甚衆  
一僧騎花虎一僧騎白鹿往來山間人常見之

朱僧名逸於河池所壽山寺打坐後脫化

石霜慈明禪師全州人姓李名楚圓大中祥符二  
年出家湘山靜隱寺其母遣之遠遊聞汾陽道昭  
因往謁焉見即蒙器異經二年未許入室一夕泣  
訴汾陽汾陽舉杖逐之明擬伸救遂掩明口乃大  
悟曰是知臨濟道出常情復留侍七年辭去依唐

明嵩禪師念母老南歸既又復出遊至瑞州留居  
洞山依聰禪師三年乃遊仰山宜春太守黃宗旦  
請開法南源三年棄去久之定居石霜嗣汾陽昭  
禪師

洪禪師宋時人少持齋好誦釋家言寓崇善寺危  
坐常如泥塑竟日不飲食壽九十餘尸解去

定慧超信者桂州人性敏悟師事瑯琊覺禪師說  
法於蘇州之定慧院為覺嫡嗣

法演桂州人志慕禪宗久無所得聞黃龍慧南風  
旨超峻曰是吾師也遂往從之紹其法後以大衆  
推主蘄州四祖山法席

開先行瑛桂州永福人毛氏子受業本州菩提寺  
長後出游至吉州隆慶院謁慶閑多所開悟次叅  
照覺頓息諸疑出世廬山之開先瑛材器廣大果  
於立事任人役物如轉石於千仞之蹊無不如意  
有照覺遺風在開先幾二十年初苦痰癖屢求去

未得卧病者三年一旦起將梵刹鼎新之九年乃成見者駭歎黃太史魯直嘗戲謂瑛為如來藏中之說客菩提場中之游俠云

萬杉紹慈桂州人趙氏子年十九振策踰衡嶽抵豫章觀馬祖遺迹聞廬山東林常總道席甚盛遂委心焉一日語次總舉拂子擊慈者再慈遽奪拂子總云汝何敢爾對曰拂子今屬慈矣總云三十年老將今被小卒摧折自此聲名藉甚推為東林

上首隨出世

德山慧初靜江府人初見善財廣叅事奮衣而起  
遂浮湘而下徧經東南所至諮詢名宿少所降挹  
乃見黃龍震言下契合因得嗣其法主常德之德  
山

契嵩字仲靈藤州鍾津縣人姓李七歲出家通經  
史志行修潔熙寧初觀察李謹欽其名奏賜紫方  
袍以昭寵異尋挹所著書遊京師府尹龍國王仲

儀上其書仁宗覽之詔付傳法院編次仍賜號明  
教自韓丞相而下莫不尊禮所著有嘉祐治平二  
集共六十餘萬言其甥沙門法燈藏之 案府志  
作慶厯初遊汴及所著有鐔津集此云熙寧疑誤  
景淳桂人工詩規模淵源出於與可元豐初居豫  
章乾明寺終日閉門不置侍者聞鄰寺齋鐘即造  
焉諸刹皆敬愛之或陰雨為送食二十年如一日  
淳詩意艱深不可遽解如夜色中旬後虛堂坐幾

更隔溪猿不叫當檻月初生又後夜客來稀幽齋  
獨掩扉月中無傍立草際一螢飛之類

齊曉桂州人碧瀾坊蕭氏子依護國寺出家既具  
戒遊湖湘依雲峯悅禪師數年悅謝世乃渡江遊  
祖山愛黃梅小招提葺為社邂逅得楊次公針芥  
相投叙雲峯錄行於世既南還舊隱道俗來謁者  
常數百人繼住寧壽寺風規凜然復還護國寺臨  
終之日四衆圍繞至中夜轟然一喝衆急趨之已

不應矣危坐三日儀采不變來瞻者踵相接

佛日禪師來賓縣金華峯第一代祖有戒行紹興中於獅子山文殊菴端坐而逝留偈云落落托托上無把捉出沒太虛無繫無縛鐵馬倒地誰人摸索

盧僧名德洪宣州人自幼棲南山廣化寺一旦不知所之郡守張自明寓京師一僧來謁曰小僧宜州人住廣化寺姓盧名德洪聞君任吾州故來謁



遂留談出一履為符自明至宜遊南山問德洪所  
在衆僧愕然云本僧別去不知所向久矣自明因  
焚香祝曰汝有靈引我以香已而香拂山左石室  
中隨往觀之有竅逗燈光德洪坐化於內一履在  
前與昔所遺者無二始知其異云

能仁者宋賜號曰紫衣禪師初悟道居勝金山後  
因建能仁寺明正德末移寺於全州南岸

鹿苑圭者桂州人嗣德山遠開法潭州鹿苑寺

寧壽善資桂人聞道寶峯導揚南土法無遠近皆  
流布一日上堂有僧問如何是廣南境師云地連  
南嶽千峯秀水接西川一派清問如何是境中人  
師云腰間曾墜石心上本無塵問上宗乘事如何  
師云一棒一痕分痛癢獨許泥牛木馬知又問如  
何是祖師西來意師以手反覆示之僧云不會師  
云若喻此如鴉啄鐵牛無下口處

善慶宋時清涼寺僧也勤戒行得悟嘗遊富川大

小洞天卒不見人以為羽化云


爽菴真者得一切觀知遠遊匿跡或有問其里姓  
但曰廣西人以故不知何州縣問所師授搔首不  
答有固問者但云吾師觀世音而已去就無常莫  
知所終

鳥焚僧正統間住衡山雁峯寺過全州謁無量禪  
師遂至懷集寓蓮花巖內年九十餘尚氓日施蔬  
食天順改元冬天火降於尚僧移蒲團巖外坐化

未幾飛鳥羣集以萬計各摘羽覆之一日如墓二  
日如廩三日如邱陵最後一鳥大如鶴摘毫俱盡  
赤肉啼於巖壁旬日枯茅叢中火起燃及羽堆大  
鳥墜火與僧同焚隨有人見一小兒騎一長尾鳥  
飛向謹山絕頂而沒

融盧禪師名真宗四川定遠人壯年雲遊至永篤  
志修行明心見性傳不二妙法首闢湘山寺大振  
宗風人咸欽信及坐化諸僧誦經舉火火及胸猶

誦大乘經不息諸僧稽首曰乞留遺衣鉢以示後  
人師始擲魚子下壇瞑目而逝時年八十有奇



廣西通志卷八十七

欽定四庫全書

史部

廣西通志卷八十八

詳校官給事中臣鄧文泮

檢討臣德生覆勘

總校官進士臣朱 鈐

校對官編修臣盧 遂

謄錄監生臣王元愷

欽定四庫全書

廣西通志卷八十八

列女

自劉向范曄而下史家類傳列女而閭德著焉其  
最不朽者尤推節烈顧慷慨捐軀無分富貴貧賤  
而水霜自勵撫遺孤養白髮則食貧之難甚於履  
豐編戶之貞光於閭閻粵西懿範見稱前乘者數  
矣此年



旌門綽楔更復所在多有益

聖朝大化旁敷無遠弗届窮陬僻壤咸知尚倫紀而敦  
苦節也茆官采蘋進風人咏歌以彰二南之化於  
粵西益徵之哉志列女

晉

綠珠博白人晉石崇妓也美而豔善吹笛崇監鎮  
徐州時孫秀使人求之崇盡出其婢妾數十人以  
示之曰在所擇使者曰受命指索綠珠不識孰是

崇勃然怒曰綠珠吾所愛不可得也使者出而又反崇竟不許秀怒乃勸趙王倫誅崇遂矯詔收崇崇謂綠珠曰我今為爾得罪綠珠泣曰當效死於官前因自投於樓下而死

### 南北朝

譙國夫人洗氏者高涼人也世為南越首領部落十餘萬家夫人幼賢明多籌畧在父母家撫循部眾能壓服諸越夫人兄南梁州刺史挺恃其富强

侵掠旁郡嶺表苦之夫人多所規諫由是怨隙止  
息海南儋耳歸附者千餘崗梁大通初羅州刺史  
馮融聞夫人有志行為其子高梁太守寶聘以為  
妻融本北燕苗裔雖世為守牧而他鄉羈旅號令  
不行夫人誠約本宗使從百姓禮每與夫寶叅決  
詞訟首領有犯法者雖親族無所縱自此政令有  
序人莫敢違會侯景反廣州都督蕭勃徵兵援臺  
高州刺史李遷仕據大臯口召寶寶欲往夫人疑

其反止之數日遷仕果反遣主帥杜平虜率兵入  
瀨石寶以告夫人曰平虜入瀨石與官兵相拒勢  
未得還遷仕在州無能為也宜遣使詐之云自未  
敢出欲遣婦往叅彼必無防慮我將千餘人步擔  
雜物倡言輸賍得至柵下賊亦可圖從之遷仕果  
大喜覘夫人衆皆擔物不設備夫人擊之大捷因  
總兵與長城侯陳霸先會於瀨石還謂寶曰陳都  
督極得衆心必能平賊君厚資給之寶卒嶺表大

亂夫人懷集百越數州晏然至陳永定二年其子  
僕年九歲遣帥諸首領朝於丹楊拜陽春郡守後  
廣州刺史歐陽紇謀反召僕至高安誘與為亂僕  
遣使歸告夫人曰我兩代忠貞不能偕汝負國遂  
發兵拒境帥百越酋長迎章昭達內外逼之紇徒  
潰散僕以夫人功封信都侯加平越中郎將轉石  
龍太守詔使持節冊夫人為太夫人齎繡纓油絡  
四馬安車一乘鼓吹一部並麾幢旌節一如刺史

儀至德中僕卒後陳國亡隋文帝遣總管韋洸安撫嶺外陳將徐璿以南康拒守洸不敢進初夫人以扶南犀杖獻陳主至此晉王廣遣陳主遺夫人書諭以國亡命其歸化并以犀杖及兵將符為信夫人見杖驗知陳亡集首領數千人盡日痛哭遣其孫魂帥衆迎洸洸至廣州嶺南悉定表魂為儀同三司冊夫人為宋康郡夫人未幾番禺人王仲宣反圍洸進兵屯衡嶺夫人遣其孫暄帥師援洸

時暄與逆黨陳佛智素相友善故遲留不進夫人大怒遣使執暄繫州獄又遣孫盎討佛智斬之進兵至南海與鹿愿軍會共敗仲宣夫人親披甲乘介馬張錦傘領毅騎衛詔使裴矩循撫諸州諸州首領皆來叅謁還令統其部落嶺南遂定帝拜盎為高州刺史仍赦出暄拜羅州刺史追贈寶為廣州總管譙國公冊夫人為譙國夫人開譙國夫人幕府置長史以下官屬給印章聽發部落六州兵

馬若有機急便宜行事降勅書褒美賜物五千段  
皇后以首飾及宴服一襲賜之夫人並盛於金篋  
并梁陳賜物各藏於一庫每歲時大會皆陳於庭  
以示子孫曰汝等宜盡赤心向天子我事三代主  
惟用一好心今賜物俱存此忠孝之報也時番州  
總管趙訥貪虐諸獠多有亡叛夫人遣長史張融  
上封事論安撫之宜并言訥罪狀上遣推訥得其  
贓竟置於法勅委夫人招慰亡叛夫人親載詔書



自稱使者歷十餘州宣述上意諭諸獯獠所至皆  
降文帝賜夫人臨振縣湯沐邑一千五百戶贈僕  
為崖州總管平原郡公仁壽初卒諡為誠敬夫人  
鍾士雄母蔣氏臨賀人士雄仕陳為伏波將軍陳  
主以士雄嶺南酋帥慮其反覆留蔣氏於都下及  
晉王廣平江南以士雄在嶺表欲以恩義致之遣  
蔣氏歸臨賀既而同郡虞子茂鍾文華等作亂攻  
城遣人召士雄士雄將應之蔣氏謂曰汝若背德

忘義我當自殺於汝前士雄遂止蔣氏復為書與  
子茂等諭以禍福子茂不從尋為官軍所敗上聞  
蔣氏甚異之封安樂縣君時尹州寡婦胡氏者不  
知何氏妻也甚有志節為邦族所重江南之亂諷  
諭宗黨守節不從叛逆封為密陵郡君

唐

全氏柳城人父亡無嗣誓不適人竭力養母母偶  
出遭虎害氏痛哭逐虎奪回母骸備棺以殮停柩

未葬比隣失火延燒氏屋氏抱柩不去焚死里人  
憫而葬其母并葬氏於側越日虎至墓前呌號躑  
躅脫爪牙而死人咸異之

宋

莫荃恭城人同縣周渭妻渭苦劉銀政賦繁重避  
地北走倉卒不暇與荃訣二子孩幼荃尚少父母  
欲嫁之荃泣誓曰渭非久困者今違難遠適必能  
自奮於是親蠶績確舂以給朝夕二子皆婚娶凡

二十六年及渭為廣南諸州轉運副使始與荃相見時人異之朱昂為作墓節婦傳紀其事

馬氏全州馬脉女也在室時脉病女晝夜侍藥不效割股進父疾瘥隣里聞於官淳祐十年太守朱朝散為之立孝忱坊

元

托克托沁潯州路達嚕噶齊伊伯哈納武德女也達嚕噶齊桑烏遜官貴州聘托克托沁為室年甫十八

桑烏遜病篤親供湯藥夙夜皇皇及死盡鬻奩具  
買棺而殮誓以同死飲清水旬日餓死奏聞立碑  
表之

文氏興安進士文少質女唐斗輔妻大德中斗輔  
任賓州幕官卒氏年二十餘哀慟幾絕執義自誓  
孝養舅姑殯葬盡禮至治中詔旌其門順帝在潛  
邸時大書節婦二字賜之

周氏田州路總管岑野先妻生子巴延氏事姑盡

孝相夫有禮年二十六野先為庶母黃氏所害并  
欲謀殺氏母子時巴延方七歲氏携之竄匿流離  
播遷十有四載後岑福廣假靖亂為名遂奪田州  
復欲購害巴延氏多方調護令巴延出見福廣以  
集人心又預規趨避以遠禍卒能拒福廣復世職  
及巴延知田州綽有政聲皆氏之教也年六十九  
以完節終

龍氏柳城人冠至殺其夫將污之氏毅然曰甘與

夫同死豈肯被賊辱乎罵不絕口賊怒射之貫胸而死

明

孝穆紀太后憲宗妃孝宗生母也賀縣人本蠻土官女成化中征蠻俘入掖庭受女史性警敏通文墨命守內藏時萬貴妃顓寵而妬後宮有娠者皆治使墮栢賢妃生悼恭太子亦為所害帝行內藏妃應對稱旨悅之一幸有娠萬貴妃知而恚甚令

婢鈞治之婢謬報曰病瘥乃謫居安樂堂久之生  
孝宗使門監張敏溺焉敏曰上未有子奈何棄之  
為哺粉餌藏之他室貴妃日伺無所得至五六歲  
未敢剪胎髮時吳后廢居西內近安樂堂密知其  
事護持惟謹帝不知也帝自悼恭太子薨數數視  
影躑躅中外羣臣皆知以貴妃故恐皇嗣不可復  
望私為帝憂成化十一年帝一日召敏櫛髮照鏡  
嘆曰老將至而無子敏伏地曰死罪萬歲已有子



也帝愕然問安在對曰奴言即死萬歲當為子主  
於是太監懷恩頓首曰敏言是皇子潛養西內今  
已六載矣匿不敢聞帝大喜即日幸西內遣使往  
迎皇子使至宣詔妃抱皇子泣曰兒去吾不得生  
兒見黃袍有鬚者即兒父也皇子衣小緋袍乘小  
輿擁至階下髮披地走投帝懷帝置之膝撫視久  
之悲喜泣下曰我子也類我使懷恩赴內閣具道  
其故羣臣皆大喜明日入賀頒詔天下移妃居永

壽宮數召見貴妃日夜泣怨曰羣小紿我是年六月妃暴薨或曰貴妃使使賜妃死或曰自縊也賜諡恭恪莊僖淑妃敏懼亦吞金死敏同安人孝宗既立為皇太子時孝肅皇太后居仁壽宮語帝曰以兒付我太子遂居仁壽一日貴妃召太子食孝肅謂太子曰兒去無食也太子至貴妃賜食曰已飽進羹曰羹疑有毒貴妃大恚曰是兒數歲即如是他日魚肉我矣因恚而成疾孝宗即位追封淑

妃皇太后諡孝穆慈慧恭恪莊僖崇天承聖純皇  
后遷葬茂陵別祀奉慈殿封后父推誠宣力武臣  
特進光祿大夫柱國慶元伯諡端僖后母伯夫人  
立祠桂林府有司歲祀大學士尹直撰哀冊有云  
親漢家堯母之門增宋室仁宗之慟帝燕閒念誦  
輒歔歔流涕也

莫氏平樂人王子敬妻年二十五歲寡居有子三  
撫視咸成立子善為諸生洪武中旌表

蔣氏大姑二姑俱全州蔣文德女父卒後見弟景  
潮年幼遂同心矢志不嫁扶弟成立終老於家勤  
於紡績置有田產蒸嘗罔替後四世孫蔣璧明以  
明經任浙江秀水縣主簿贊曰冰潔閨門二祖姑  
同心不嫁世間無立宗扶弟興家業遐邇咸欽女  
丈夫十一世孫舉人蔣鵬贊曰滄海有珠荆山有  
玉不雕不琢守貞抱璞兩姑有焉青史足錄女中  
丈夫古今有躅

蔣氏三姑全州蔣文紹女文德姪女也母老多疾  
無兄弟氏夫志養母終不適人至老而卒後蔣璧  
明贊曰不容冰語說良人固守香閨一點貞纖絀  
組紉惟自處素娥青女共精神十世孫舉人蔣宗  
芝贊曰旗山之陽有奇女焉如珠隱淵如玉藏璞  
如芝蘭之幽秀如松柏之勁骨繡閣香閨終身獨  
賢矣哉克家為令子撫弟即賢兄亘千秋而萬世  
孰與我姑而爭榮

蔣氏四姑全州蔣珣譽女珣譽生一子一女女見弟弱悲父老病守志養父不肯適人力紡績以終養蔣璧明贊曰謹遵父命撫弟持家貞心一點與月光華舉人蔣鵬贊曰粵我四姑聞風興起不願有家惟知青史

龍氏滕縣人妻王克讓克讓早卒氏孝養舅姑舅歿既葬姑憐其少勸改適氏泣對曰舅姑一也且此身既為王氏婦矣敢有他志永樂間旌之

蕭氏橫州人同知蕭珪女適州民楊端時年十八  
端病卒哀毀欲絕服闋姑憐其少欲嫁之氏曰夫  
死姑在願事終身若再醮不孝不義非人類也守  
節五十一年而歿有司奏請旌表

李氏桂平人甘坦然妻結褵半載夫殞事姑盡孝  
敬父母欲奪其志斷髮自誓年十八守節至七十  
而歿表聞旌表

徐氏武宣人黎金妻夫卒撫遺子臯教之讀書領

永樂鄉薦臯卒妻張氏妾王氏俱堅志守節

覃氏永淳人甘長壽妻善事舅姑勤紡績年二十  
三寡居屏去服飾終身無二志初長壽歿覃方娠  
生子昆昆娶數年又歿氏撫二孫成立正統間旌  
之

袁氏全州陳學顏妻學顏早卒子處厚方數歲氏  
守志不渝姑憫其年少陰使人諷之氏泣曰烈女  
不更二夫姑脫不諒此心當一死以從夫地下議



遂寢孝養不衰永樂間旌表

余氏全州陳士妻士即學顏弟生子樸未彌月士卒氏年二十五矢志不二及樸成立族黨將以聞氏命樸辭且曰吾待亡於此焉用名為嫂袁既受旌表一門有輝苟復為此是逐名也聞者益重之後建雙節坊

蔣氏懷集人靖州知州蘇恣妻宣德間恣從征死於寇無子氏年二十六矢志終身夫忠婦節世稱

雙美

李氏博白人秦健妻年二十健亡哀幾喪明父母  
憫其無子諷再適氏不從孀居五十餘年人無間  
言

劉氏宣化劉裕女年十九歸黃聰生子正甫暮月  
而聰卒氏哀毀幾絕事姑撫幼誓不二志正甫後  
領鄉貢任嵩明州同知廉能有聲人以為賢訓所  
致孀居六十餘年至八十二卒

王氏陽朔人全溥妾景泰間溥隨父任娶氏歸經  
灘江遇賊僕輩皆赴水溥將隨之氏牢執溥手賊  
舉刃向溥氏以手遮溥項創輕得不死抵家衆嗟  
嘆曰無此手則無此項矣氏生五子皆以科第顯  
壽六十九乃終

大同里婦正統間叅將范信兵旣入潯州平南縣  
大同里俘獲甚衆旗牌官人給賊婦一二人拘繫  
一室中每多自經者又有一婦年尚少負一小兒

過嶺忍不行曰吾欲乳兒兵從之婦乘間投嶺下死

羅氏永淳人龍居德妻景泰三年盜刼搏塘村男婦多被擄得氏驅以行氏伺間投水涯賊出之傷其目賊猶未即舍繫其頸固不肯行罵曰我必不受賊辱賊怒夫解之

盧氏泗城土知州岑瑄妻瑄故無嗣目民推盧氏權攝州印天順六年奉調征貴州苗賊有功封正

壽夫人卒女妙定衆推管理州事天順八年復奉調出征貴州苗賊有功封鎮國夫人

唐氏臨桂人趙存質妻夫亡時二十五歲姑老子幼氏養姑撫子五十餘年守節不變成化十三年旌表

陶氏臨桂縣舍人徐駿妻駿卒於龍州氏聞訃哀毀即刺血自寫云無兒難留婦烈女不二夫夫死無子不如一死藏之篋笥以衣衾悉付舅姑遂縊

死三日遺夢女姪曰吾心事盡在篋中啓之得氏手筆事聞旌之

丁氏臨桂人劉鵠妻鵠亡氏年十九子淳方三歲姑萬氏諷之嫁氏曰吾命在姑與子矣不知有他堅志五十七歲成化中旌表

李氏馬平人簡文安文有女曰元贅婿陶君智文為福建布政司經歷婿隨之官文與妻邵氏皆歿氏率二孤輔弼扶喪歸經永福深定灘遇賊君智

禦之不勝墮水死氏出所有服飾啖賊且曰此外  
惟身一死可表但乞不驚兩幼子足矣語畢遂投  
水賊嗟惋而去氏漂附岸得不死收君智屍并載  
歸撫養二孤元亦願相依不他適後輔成正德辛  
未進士弼鄉舉給事中徐文溥為作簡門雙節傳  
覃氏北流人李以弼妻年二十四以弼卒姑憫其  
少欲令再醮氏以死自矢事舅姑撫幼子閨門正  
肅始終弗渝

楊氏靈川人崔毅妻年二十歸毅毅競渡溺水死  
氏痛哭欲自盡念夫無嗣以方娠冀生子及娩廼  
女族人咸勸曰女何足恃汝年少服闋更適可也  
氏曰世固有無息而義不悖夫者伊何人哉況夫  
死顛沛無一言訣今欲再適惟起九泉與語爾自  
是族人無敢言者女長適庾門生子登仕籍氏壽  
八十而終

蔣氏名妙慶宜山民蔣廷璉女歸莫朝宣朝宣頌



景泰癸酉鄉薦卒氏年二十二翁姑哀其寡將嫁之氏義不許以女工自給訓子驕業儒應貢亦卒氏率其婦甘淡薄躬勤苦撫育三孫自滿自廣自矜皆有成年七十終

侯氏百戶膺之女適計璉璉以會試卒於京長子七歲次子甫六月氏堅志苦守撫孤成立年七十卒

譚氏蒼梧人舉人歐良妻良死氏年二十二無子

以死自誓孀居四十餘年以完節終

鍾氏蒼梧人阮應福妻年二十喪夫家貧甚力撫遺孤守節不二

陸氏思明府頭目陸祥女適土知府黃鈞生子道甫七歲土寇作亂鈞與其父珣俱被害氏携道避難上思州水漿不入口者三日或強之食答曰為保遺孤苟存性命尚靦顏對人飲食耶其父祥為赴愬左江各當事仇得復乃回思明及道長襲職

氏嘗述艱苦狀勉之曰毋忘此也閩郡咸稱貞淑  
蕭氏宣化蕭瞻女適南寧衛左所舍餘陳剛之子  
夫亡氏年十九矢志不移坐臥一樓足不履地者  
數年以完節終有司奏旌其門

譚氏全州人曹森妻年十四守節壽至九十七歲  
成化間題請旌表

蔣氏全州人進士陳珩妻夫歿無子氏年二十五  
誓死守志六十八歲終

張氏全州人蔣嘽妻年二十八守節七十一歲終  
宋氏全州人張徵妻年二十三守節六十七歲終  
周氏恭城周良彪女年十六適常有德越二年有  
德死無子家故貧姑強之改適氏泣曰姑有叔可  
奉餘年乃盡以簪珥遺其姑獨與母相依歲時則  
返拜姑於堂如此者五十年始終無間

黃氏恭城人周祐之妻隨夫任廣東龍門學諭因  
姑徐氏年老請於夫願回侍養至白沙冲口羣賊

刳舟欲污之斷臂不屈罵賊竟與妾李氏義婦阿  
魯遇難其子郡被擄入巢後贖出憫母陳情當道  
旌之

徐氏博白人李啓東妻成化間龍山賊攻陷縣城  
被執欲污之氏厲聲罵不絕口賊怒磔之

阮氏蒼梧人廖紹祿妻年二十三而寡子襁褓誓  
不二志家貧勤紡績以撫孤隣舍遭火延燒其居  
時夫柩未殯募人遷徙至中門棺緋斷烟燄蔽門

幾及於樞氏撫膺慟哭願與俱焚天忽返風火及中門而滅時人嗟異之

張義姑者桂林衛鎮撫張禮女禮征安南卒子福赴承襲亦道卒義姑時年十五福妻劉有子輝方六歲家貧甚義姑察劉難久留一日語劉曰嫂嫁則孤不能存孤不存則張祀絕矣吾張氏女義當為張存孤敢復累嫂長貧居哉已而劉遂改適義姑備歷苦辛撫輝成立為娶婦生子玉且誠輝曰

爾祖爾父俱以世祿故死道路吾拮据萬狀撫汝不欲令嗣宗職以蹈不測宜習耕讀玉生策簡節策節並應鄉舉簡三子亦繼鄉舉奉旨立坊旌其門特祠所居旁署其名曰義姑祠

蔣氏全州蔣希敏女十歲母死十七父又死家貧二弟幼且疾誓不嫁以撫二弟舅氏為之謀婚氏曰我嫁而使弟失所萬一不幸父絕嗣何忍也吾志已定毋多言舅為之泣氏起居謹嚴憂勤自勵

日操井日夜業女工弟長皆為娶婦後諸姪林立  
家業日裕皆氏力也

李氏平樂人陶舜相妻舜相父瑄官四川井研令  
及歸休與子舜相樂相俱被荔浦徭難氏計全宗  
祀以被累七歲子銀置重賄於其內擲下水樓氏  
亦從之下賊利財物因得釋徙石面山巖口居焉  
銀生四子四世為明經子孫在庠食餼者日益衆  
人謂氏節義所遺云



劉氏上思州人其夫黃旻以州兵從軍古田死軍中氏聞之哀不自勝恪守婦道操履冰霜誨二子日和日曙勤學曰兵凶戰危汝父遭厄即前鑒也後二子相次歿復教孫德裕士民公舉正德六年建坊旌表曰節耀南天

常氏恭城常汝敬女年十八適尹監賢未幾監賢卒父與其舅憐之謀奪氏志不可得乃陰許人昇者至門促之行氏竊負其子之監賢葬所欲自殺

隣嫗奔救之乃免自是父不敢復言饑寒入骨人不能堪而志操愈勵

黃氏博白黃仕慶女年十八歸秦思諍舉一子三歲思諍卒氏年二十一哀毀骨立矢志不易弘治三年督府秦紘旌其門

陳氏永淳人李序妻年二十七序卒於京邸氏哭幾絕葬祭如禮煢煢獨處者三十年雖至親不能一見弘治十三年知縣王淵旌以匾

梁氏武宣所舍人王炳妻舉人梁高女也炳卒氏甫十八家貧苦誓死守節晝夜紡績自給育遺腹孤用賢補縣學弟子員又卒孫肇伯尚幼氏又育之襲祖千戶職氏年七十有五人無間言

蕭氏富川蕭能女年十八歸余晨越二年晨卒舅姑亦相繼亡氏殯殮如禮無子家甚貧惟以女工給朝夕年踰七十人無間言正德十六年賊入南關氏遇害聞者悲惋

雷氏四會人歸陳仲鑑居賀之封陽墟正德間上下崗諸猺大肆焚劫見氏有美色擁之以行至五顯廟欲污之氏伏地罵不絕口賊脅以刃罵愈厲賊怒殺之

張氏藤縣人李可信妻可信歿氏守苦節六十年如一日弘治間督學姚鏌旌之

梁氏蒼梧人舉人李實妻十九而孀遺腹一子辛勤撫鞠事姑以孝聞姑死或諷其再醮輒以義斥

之貧甚節益謹其子娶婦舉一孫而子復夭婦又他適氏撫孤孫備極艱苦督學周益中旌之

石氏蒼梧人尹世雍妻知縣石瓏女歸九載世雍卒無子家貧甚或勸氏毋自苦氏叱之姑亦早孀性嚴厲日紡績奉甘旨相依始終不少間時人稱為雙節

麥氏蒼梧人劉濟邦妻濟邦病篤氏知其不起預設二棺濟邦死氏即自經

劉氏興業人楊四妻年二十四楊卒有富商欲奪之啗以財氏矢志不二乃百計懾誘強以必從氏服毒死

李氏名妙容岑溪人年二十適舉人羅章章赴南宮卒於途氏哀慟瀕死姑耄事之曲謹里人嚴定求仇儷氏大恚服毒幾死力救乃免知縣陳琦賑以粟帛

傅氏懷集人潘聰妻聰客死同客者以其骸歸氏

抱之號哀幾絕及葬誓曰吾必從夫地下遂縊於  
後圃鄰婦力護之不得死乃潛縊於寢室所親買  
棺殮之與夫骸合葬御史李良臣為立碑致祭  
李氏懷集人莫瓊妻年二十四而瓊卒生子源貧  
甚氏守節撫源源長娶婦甫成立而又卒氏抱鞠  
幼孫更相為命終始無間

陳氏融縣人進士李序妻年二十七序官吏科給  
事卒於京氏哭絕復甦扶柩還獨守一室歷三十

載至親莫見其面弘治十三年有司上其事旌表  
有卓節坊

彭氏博白舉人秦夢虞母事姑至孝年二十五孀  
居家極貧撫夢虞成立詔准建坊旌表

謝氏陸川人朱文盛妻正德七年妖賊李通竇犯  
城獲文盛縛寘木上索其金贖氏度無措語姑曰  
夫在可撫幼兒不若以婦易夫姑兩難之氏毅然  
往紹賊曰夫所寶藏妾不知所願以身代夫取銀



贖妾賊利其財且將漁其色遂許焉久不至賊欲汚之氏大罵曰癡奴吾誑出夫耳賊怒醢之

下陋女永福人逸其姓名正德間女將嫁適獐賊夜掠其村為所得自度難脫遂紹獐曰有首飾若干在某所當取與俱獐信其言因挾之往適道旁焚廩火烈遂投入以死

覃氏陳氏俱融縣人夫死守節建坊旌表

林閨善富川人林棟女年十六色端麗未嫁遭賊

剽掠所居閨善出走賊蹤跡擁之去閨善泣不行  
賊負之背因啗負者乃棄之地欲汚之隨脅以刃  
曰不將斷頭閨善罵曰賊奴身從汝碎不從汝汚  
何論斷頭賊憤甚刃亂下竟支解焉

易氏義寧易華女居大塘村賊突刼本村掠氏與  
諸婦女將去氏恐遭賊汚堅不行或有勸者氏曰  
吾必死死他處不如吾村賊無以強因害之

謝氏羅城太學生謝榮女正德初蠻寇刼其里見

氏有殊色爭輿以行欲污之罵曰我何人家女肯從爾輩耶即取刀自殺

龔氏永福龔澄女也有殊姿正德十五年古田賊刦其村擄婦女五六人及牛畜而去至河氏語賊曰吾不能行願得騎牛而渡賊從之乃策牛入龍潭自沈死

曹氏全州人孝廉袁具體妻年十七守節至八十餘卒巡按御史題請旌表曰偉節貞操

投河女賀縣人正德初霜降日縣祭軍牙六纛神  
畢方享胙邏卒報賊破民寨見一女子服新服從  
崖上投於河浮至灘下父老以舟救之得不死墜  
崖投河懼為賊污也幸不死殆天有以相之惜姓  
名不傳

袁氏全州人生員廖必懋妻年十七守節至七十  
六歲人無間言巡按御史題准旌表

廖氏全州人舉人唐汾妻年二十六夫亡無子家

貧守節至八十歲卒巡按御史題准旌表

陳氏名壽姑全州舉人陳雲鵬女年十二隨父任曲江教諭父病危篤醫藥罔效女泣血不已默禱於天割股救父父疾頓痊尋疾復作卒於官事上院司給匾旌獎曰閨秀流芳曰湘離孝女

李氏全州人陳良佐妻年十七守節至八十三歲卒巡按御史題准旌表

容氏陽朔人庠生王昆妻昆卒氏年二十誓不更

適孀居四十年杜門苦節正德間巡按御史旌其門

劉氏辰秀貴州銅仁人父劉仁次正德辛巳倅梧  
州辰秀偕庶母張氏郭氏弟時舉幼妹祈秀堂兄  
時復族兄時澄隨父之任仁次卒於途舟泊昭平  
堡聞莞藤諸巷灘有寇舟人皆恐辰秀聞之指江  
曰萬一不免死此而已二庶母亦曰不幸誠如爾  
言相抱而哭無何賊至辰秀曰敢辱先人乎獨恨

此櫬無歸耳亟投緹囊啗賊乘間赴水死張氏抱  
祈秀繼之郭踵繼之俱死辰秀年十六張年二十  
郭年二十八賊怒盡斬其僕婢繫時舉入巢時澄  
病偃舵隅時復隱瞋枕側得不死憇於守臣沿洄  
索尸藁葬昭平江上金谿張賓祿與仁次有舊及  
至知狀乃以金錢遣謀計出時舉當事給傳俾載  
櫓車與其孤還久之得旨旌表建三烈祠於昭州  
後時舉以孝廉為平樂司馬正其遇難處

陳氏懷集人梁可珍妻年二十三夫死守節始終不渝

宋氏南丹衛舍人禮女適舍人甘誠生子甫辟誠卒家貧織紵自給母強之改嫁氏抱姑大哭曰婦人之義從一而終況吾為世祿之家適他姓何以見先人焚香告天誓死不二後撫子霖成立任柳慶叅將正德十三年旌表

黃氏陽朔人通判黎禧之妾禧任新淦令時妖人



作亂聚衆刦縣取印氏卧禧身上大罵賊挺刃砍其面流血滿地賊退得不死撫按交章御賜珠冠不受而讓其正室壽七十終

李氏懷集人袁緯妻年十八子方一歲緯死守節甘貧親隣交慮之氏曰命也更復何適苦節六十餘年壽至八十六乃卒

駱氏尚書吳廷舉之母處士英之妻英早世哭幾絕闔扉屏處廷舉遭暴疾羣叔意其必死欲具槨

禁母為禱藥氏勿聽晝夜不少瞬諸姬番休更視  
疾竟瘳少長督之學曰若不逐晷自策勵日與鄉  
人俱而母將何歸耶時家索莫甚歲連祲而師賓  
問遺率如常已則澣滌紉綴性不喜紛華嫁時衣  
三十年尚襜如也花晨燈夕蒼梧以遊觀為俗酷  
惡之俗有化之者年五十而卒

張氏梧州守元春女也歸方指揮使能順事舅姑  
指揮與姚源盜戰死氏年二十二有娠即默禱曰

男也吾與俱女則俱殉矣踰月而舉子恩指揮家  
故涼姑茶履棘朝夕不保奉其姑戴與恩相依為  
命者四十年恩就外傳氏督之甚劬時時語以父  
死國事勗其勵志成立嘉靖初卹死事授恩都指  
揮僉事既以氏貞節聞復詔旌閭而恩得僉書江  
西都司氏曰兒一旦蒙國恩名位抗藩臬諸拜跪  
受事者固乃父輩儕人也少有瑕指摘者競起敗  
矣須勉為之已而恩擢漕運叅將氏身留養姑姑

歿以毀瘁卒

彭氏宜山人王尚忠妻尚忠母孫氏老而瞽氏事之曲謹姑甚安之尚忠為都司承差携氏偕往居廨僅四月每思其姑輒垂涕未幾尚忠得檄遣之京送氏西還舟經洛黃灘遭獐賊遮刦尚忠與之鬪不勝而死賊拽氏登岸令數人守之隨入舟取其貲氏投水死越數日二屍並浮水上顏色如生梁氏武緣人梁容女嘉靖間年十七未嫁會八砦

賊四出流劫犯其家擄之行且欲奪氏耳金環氏  
潛取置握中賊笑曰爾身已屬吾何祇環也行至  
村前木綿樹下抱木號呼賊曰爾不畏死乎氏曰  
死即死父母鄉土不從賊賊刃之數日面如生手  
執金環如故

梁氏新鬱林民梁英女年十七嘉靖乙丑流賊王  
道通剽掠鄉邑入氏村被執欲污之氏曰首可碎  
不可辱也強扶乘馬盤足不就厲聲罵賊折其齒

復罵不絕口即被害死越宿其容如生所聘夫至  
撫屍大慟然後瞑目聞者莫不哀之隆慶初旌表  
鄭氏懷集人陸滿妻年二十四滿卒堅志終身

蔡氏三妹四妹者雒容蔡瑤女也三適褚本紀夫  
亡歸依瑤四許嫁潘仁尚未婚嘉靖中以征田州  
調永順保靖兵所經過輒恣淫虐姊妹出走避匿  
兵望見逐之兩人計不得脫相携墜崖姊即死妹  
昇至家踰日卒

劉氏宣化人陳清妻清死於水子琚幼氏大慟曰  
本期偕死奈若孤何因督琚力學琚益自厲以貢  
為德慶判官感奮立功與賊戰死之琚子大經登  
鄉舉大綸成進士孫起耕亦領鄉薦為邕著姓邕  
人稱氏為女宗

鄭氏臨桂人適曾璋璋有一妾氏處之坦然璋仕  
卒於官子三省方四歲氏語妾曰家貧子幼吾當  
為夫養子汝意云何妾曰官既不幸夫人即所天

生死以之豈有他意氏遂與妾同護喪還舟經全州三省偶墜水氏即赴水救之妾忙挽以上並得不死比歸兩人勤女紅教三省學稱雙節云

李氏藤縣人庠生霍文諫妻文諫卒氏年二十有四誓不再適事瞽姑撫二幼穉艱苦不渝姑目復明人稱孝感所致子有菁庠生有輩歲薦壽七八終嘉靖間知縣林傑旌其門

程氏劉氏崇善人嘉靖時本府孝廉黃子顏媳也



子顏生子三人長佶次億次侃佶娶程氏億娶劉氏佶與億相繼早亡程年十九無子劉年二十一止一女父母憐其少欲為改嫁二人以死自誓同處一室併力女工上事翁姑下撫弱女數十年如一日有司以聞詔加旌表後侃亦舉孝廉時人稱之曰一門雙守節二代兩登科

王氏馬平人庠生范維式妻割股救夫夫死守節教子次子應芳舉鄉薦

呂氏馬平人諸生劉濟仁妻年二十濟仁卒時氏方娠其長子猶在襁褓中家貧甚里貴有欲娶者兄弟更勸改適氏怒曰人各有志何用相逼以頭觸柱血流被體兄弟不敢強守節六十餘年

劉氏宜山人彭諫妻諫出經商遭賊死氏聞哭謂妯娌曰夫亡義不獨存幸善事姑兼撫視汝女姪吾死足矣即閉門自縊妯娌往救氣未絕從旁護視者密氏乃不飲食亡何諫喪至氏往迎且行且

哭因齧舌而死

蔣玉真全州蔣三畏女年十七適伍守規二年夫死無子玉真謀欲死舅姑憂之使守規之弟婦將其子寘玉真懷曰子之祀伯父可乎隨拜曰幸甚乃卜吉迎為子舅姑安其養

王氏宣化生員王煦女適舉人鄧繼魁繼魁赴試病亡氏年二十有八無子聞訃痛絕逮輿櫬歸葬潛繼壙所親屬救甦平居足不踰戶外守志終身

嘉靖間旌其門

唐氏全州人蔣大韶妻大韶卒無子孝事舅姑誓  
不易志八十有五卒

劉氏臨桂人舉人魏希儒妻年十五于歸於魏魏  
上春官卒計至痛哭幾絕誓以身殉家人屢諭之  
弗能止哭七日絕飲食不進臨死謂父綱曰以孝  
衣殮我則瞑目矣

秦氏臨桂人唐承宗妻年二十二承宗卒哀慟幾

絕指天自誓孀居六十餘年始終如一

楊氏馴象衛處士楊芳女適衛人徐銓三載銓卒  
生一子名潒甫五月氏年十九誓不再嫁甘貧食  
苦撫孤成立年六十五卒子潒哀毀逾禮人謂母  
節子孝云

黃氏馴象衛耆士黃洪女適陸教授子堯臣甫七  
月堯臣送父赴部卒於南安氏朝夕哀毀誓不再  
嫁所親或勸之氏曰死生易志豈人哉撫姪為嗣

年五十餘卒

汪氏慶遠衛舍人王覲妻年二十二覲罹大咎被  
箠創深肉盡腐氏飲泣以口吮朝夕供湯藥不離  
側既劇甚度不能療乃告公姑曰夫死不幸妾不  
忍獨生相違泉下也幼女幸善撫之俄頃撫牀扼  
吭而卒

袁氏全州人蔣文妻年十七歸蔣尋寡遂屏膏沐  
矢志守貞年至八十又馬氏適蔣輔即文從弟歸

未十稔夫死無子孀居五十七年與袁並以完節  
終都憲周詠以詩有要識忠貞無二道米薇詞並  
栢舟詩又有爭似寒閨雙女婦隱然桑濮一長城  
之句

馬氏靈川人詹廷玉妻廷玉偕父母相繼死遺二  
孤朝不謀夕氏勤紡績自給教男習學長子忠補  
邑庠生未幾亦死氏守志如一壽九十

瓦氏田州人指揮同知岑猛妻生子邦彥見夫所

行事違於正義必委曲陳諫諫不聽至於流涕嘉  
靖六年夫與子相繼喪亡氏年三十刻苦勵節孫  
名芝方乳善護之後襲知州氏朝夕語以朝廷恩  
德宜撫循遺民勤修厥職二十九年芝從征南海  
歿於王事氏撫曾孫太壽太壽夭復撫太祿凡州  
之利害躬為規畫內外凜然三十三年倭寇南畿  
并浙江朝議徵廣西狼兵督府以檄至氏以太祿  
幼不能任兵事請於督府願身往督府壯之題授



女官叅將總兵赴南畿明年四月至蘇州寇方據  
州沙窪枯木為巢勢甚熾聞狼兵至分衆數千過  
金山衛總兵俞大猷遣氏同遊擊白汝邀之頗有  
斬獲移兵漕涇戰不利頭目鍾富黃維等十四人  
死於陣五月賊犯嘉興從叅將盧鏜攻之大敗賊  
於石塘灣自後從征多著勞績嗣以疾告歸抵家  
未幾卒年五十有九

陸氏馬平人殷傑妻傑死氏年二十二未有子鄉

人聞其賢有將委禽者父母許之氏曰父母使為  
殷家婦有年矣何忍奪而之他惟有自盡而已父  
母不敢強後以從子轍為嗣壽八十餘

扈女容縣扈塗女也年十六受甘禮聘未嫁而禮  
亡父母又相繼死氏抗節守貞朝夕紡績不離臥  
房以女終奉詔旌其門曰冰霜婦節

豐氏武緣人年十三適諸生王旒旒早亡氏年二  
十二謝鉛華養姑撫幼苦節自甘親屬勸之改適

氏正詞拒之巡按朱炳如題准旌表予一元武科

第一

楊氏鬱林人孝廉曾才魯之母年十六孀居撫孤始終不渝按察使王凱旌表

文氏名淑環鬱林人鄉賢旭之女適生員廖錦年二十三無子錦應試卒於途氏矢志守節時有鄉貴遣媒議婚者氏峻拒之泣而言曰安有忠烈之孫孝廉之女肯事二夫耶自是蓬頭赤足蔬食縞

衣卒年八十嘉靖二年州守旌其閭曰清圭白璧  
廖氏賓州人吳道應妻十六歲歸吳逾年生子能  
甫三月道應卒氏哀毀幾絕舅姑諭以存孤為重  
始勉自抑矢志守節歷八十五歲奏表其門

陸氏桂平人受聘未笄而夫卒氏悲慟久之父母  
欲別議婚氏泣對曰古人解劍懸墓特以明此心  
矧夫婦大倫可生死易心乎以終身誓竟不能奪  
年八十人號曰貞姑

朱茉莉貴縣故長史朱澄妾澄卒茉莉年僅二十  
欲自絕以從有邑豪計奪之且倚官勢相逼茉莉  
度不能免泣訴之嫡母彭氏遂縊而死

李氏土官李琛女適歸順州土官長子岑瑤瑤為  
其弟所殺氏年二十七復於父母家父母強之改  
適不聽氏婢四十五人馭之甚嚴晝常鎖外戶不  
使與僮僕相見夜明燈坐中堂羣婢環之紡績至  
雞鳴乃鎖門而寢晚年操守益嚴

吳氏興業人黎文明妻嘉靖間文明知雲南赤佐  
縣卒於官六載不能歸櫬佐人葬邑旁氏撫遺孤  
日夜號泣鬻簪環衣服不憚萬里往文明葬處奉  
棺以歸會憲司李文鳳哀其志厚恤之始獲畢事  
直指朱按部旌以匾直指黃亦給粟帛焉

莫氏蒼梧人舉人劉思聰妻思聰授程鄉縣教諭  
赴府為賊所執氏聞撫膺嘔血死邑人士憐之為  
立貞烈坊於程鄉學前

李氏懷集人梁允珩妻允珩少警敏病卒氏年二十七矢志栢舟和熊訓子其子杲司訓寧化文行優裕為閩人所宗氏性整肅至老年諸媳有稍不檢約立杖之年九十七一日呼子孫數十人齊集訓諭曰我守節七十年始終如一今且厭世矣可熱水潔身以行入房浴畢飾服命椅坐而逝世人異之

李氏宣化人南寧衛舍人椿之女舉人白米妻年

二十二夫亡無子誓不他適操志自堅嘉靖二十六年巡按御史徐南金檄府優賚禮幣旌其門

王氏永淳人何燦妻年二十七燦歿無子氏誓守節家貧力食始終如一內外無間言事舅姑以孝聞年七十五終

萬氏滕縣人諸生林俊妻年二十六俊卒有議改適者氏每闔戶求自盡姑為備得不死議亦寢而勵志愈堅年八十餘嘉靖己亥有司以事聞旌表



其門

呂氏馬平庠生劉生知妻劉死氏撫遺腹子勵志  
完節年九十三卒嘉靖中賜貞節上壽坊

文氏全州人伍彥銘妻年十九守節至七十八歲  
卒

張氏灌陽貢生張鑑女庠生唐應星妻也隆慶五  
年古田徭賊肆劫全灌氏年二十一歲為賊所獲  
厲罵不屈賊怒揮刀腰斷之崇禎六年巡按畢佐

周疏聞詔旌其閭曰烈節

許氏博白人程萬昌妻年二十一萬昌死遺腹一子家貧守節豪有力者欲奪志咸拒絕之年八十以完節終當事數旌獎有詔豎坊

甘氏橫州人歸永淳陸紹科紹科年十九中嘉靖壬午舉人後五年卒氏二十五歲矢志守節撫孤子傑入成均壽至八十隆慶六年知縣張治核實表揚

陳氏賓州人舒錦妻年二十二夫亡遺子泰方二  
歲家貧以女紅自活孀居二十餘載隣人不識其  
面母強其改嫁氏堅拒之泰長力學以明經任長  
樂教諭迎母祿養年八十四卒萬厯元年旌表  
李氏義寧人石崇安妻年十九歲夫亡氏自矢不  
再醮堅貞不渝年八十終

蔣氏全州人探花舒宏志妻光祿卿遵箴女夫亡  
守節奉旨旌表建坊曰詞臣貞配

謝四姑全州謝椿女許配灌陽呂茂正年十七未  
嫁茂正歿謝聞一慟而絕救甦明日縞衣白父母  
請得詣其家持喪不許遂遙為位薰沐哭臨朝夕  
上奠不數月竟以哀歿卒司李連繼芳旌其門曰  
全節

李氏宣化人蕭相妻相登萬厯己卯鄉薦任貴州  
司李卒於官訃聞氏誓不獨生引刀自刎以救免  
時年二十五事聞建坊表其門曰冰霜表烈孀居

五十餘年壽七十有七御史呂圖南贈以匾曰完節天留

毛氏賀縣毛健女歸劉玉明年二十六夫亡誓不再適撫二子天祚天祐及長補邑諸生相繼卒天祚妻羅年二十五天祐妻吳年二十六咸不嫁與姑相守終身無間言知縣曾一誠表其廬曰一門三節萬厯二十三年建坊旌表

唐氏全州人將李選妻李選早卒氏孝事舅姑訓

子獻奇成名仕新興州知州兩廣總督旌其門曰  
冰操榮壽年八十三卒

伍氏全州人庠生蔣季印妻藍山知縣守恭母季  
印二十而卒氏青年守節教子成名諸孫雋發皆  
氏內教所貽壽八十有八

朱氏臨桂人何與晉妻年二十二夫死氏痛絕再  
四時長子僅三歲次猶未娩家甚貧夫志守節事  
翁姑克盡孝道人無間言壽六十有三

方氏永福人舉人秦照妻年十六適秦生子嘉穀甫四歲而照卒氏哀毀欲自盡父鏞慰之曰汝秦門冢婦親老子幼死不如生也氏勉從父命事翁姑以孝聞撫幼子成立孀居四十餘年內外無間言撫按上其事奉旨建貞節坊以旌之

彭氏平樂縣百戶徐特溥妻年二十四夫亡無子三年內日哭夜止及五旬餘每遇生死二日哭泣盡哀不稍間府江道翁汝進奏之朝旌表其門歲

給米二石帛二疋壽七十五而終

何氏興業人譚賁妻年十八賁卒氏號泣幾絕及殯憑棺大慟以死殉衆救獲免誓不再適念夫無後請於舅姑立幼姪汝試為夫後撫養教訓得領鄉書第一萬厯二十二年詔旌表直指以文祭其墓

朱氏平樂人廩生莫婁妻年二十三寡居一子弘勛教育成人中萬厯戊午鄉榜年及六旬公舉奏



聞建貞節坊

蔣氏恭城明經蔣敬軒女適庠生張懋生生二子  
夫死敬軒間以意試之氏泣曰女以二孤在襁莫  
能殉夫地下命之不淑乃至於斯安有身出禮義  
之門曾不能一姓終也屏膏沐斂笑言辟纊撫孤  
數十年如一日壽七十六而終

舒氏桂林中衛舍人舒檜之女年十六歸於本所  
應襲千戶劉采采卒氏方二十一歲一子國泰在

襁褓氏慟哭幾絕或弔之曰夫人甚少胡自苦若是氏厲聲曰氏所以不即逝者以繼姑幼男在也生為劉婦死為劉鬼而已獨處一室惟勤紡績撫孤而教之雖諸娣如非大故不相見事繼姑以孝聞年六十有四志節皦如

劉氏名顯姑賀縣劉政女年及笄父兄為擇壻無中選者顯姑曰吾命也願終身不嫁閨壺嚴肅凜然如烈丈夫壽七十有六人呼為貞女

林氏懷集人梁起潛妻起潛卒氏年二十四父母  
以家窶勸其再醮氏紡績撫孤誓死不從次子儲  
英有聲黌序諸孫林立人欽其苦節之報壽八十  
有七

袁氏賀縣百戶鸚女年十七歸千戶房繼先生子  
毓嘉靖三十一年繼先死氏年二十六撫子成立  
志節不渝萬歷三十年題准立坊旌表

毛氏賀縣毛顯達女年十七嫁於車軾生子獻孫

僅週歲而夫死氏年二十四自矢靡他苦節以終  
萬厯三十一年撫按道咸題額旌獎

陸氏賀縣陸儀女年十八歸生員江中耀七年夫  
死無子氏誓不他適節凜冰霜院司表獎

李氏思恩千戶所總旗虞汴妻年十七歸汴家徒  
四壁晝夜紡績姑性嚴氏恒勸汴愉婉順親志汴  
歿年二十四欲以死殉姑勸之乃止孀居五十餘  
年巡按御史朱炳如旌表

李氏滕縣人胡英妻英死氏年二十五無子誓不再適事姑以孝稱姑歿殯葬如禮萬厯間督學黃佐旌其門

林氏容縣人覃泰妻年十八歸泰泰卒誓不再嫁家甚貧紡績自給前後直指使者四旌其門

吳氏鬱林人舉人陳所蘊妻年二十二所蘊會試道亡氏聞訃旬日不食欲以死殉姑諭止之事姑三年姑憐其少無子欲嫁之氏引刀自毀其貌姑

死拮据以葬屢膺旌表有詔建坊

潘氏容縣潘龍駿女年十六適生員楊允齊甫七日而夫死氏矢志孀守閨範肅然萬厯四十五年三院旌之

陶氏鬱林人生員鄧日孚妻日孚鄉試還離江舟覆死訃聞氏吞金絕粒半月不死遂盡焚服飾葬穿二穴志在相殉又為妯娌所阻不果乃衣素食蔬杜親戚寢處一室以終後建坊旌表

鄧氏懷集人徐葵妻葵死誓志守節年二十有四  
有子二和熊九訓之長應坤以萬厯選貢判嘉定  
州壽九十餘知縣謝君惠旌其門曰貞慈裕後

于氏懷集人張雲祥妻萬厯初尙穉嚴秀珠反雲  
祥從堂兄百戶大經進勦陣亡氏年二十三舅姑  
垂老子中美僅三齡氏日紡績以養親夜則燃薪  
課子既而舅姑連喪悲苦彌深霜操益勵督孤子  
勤業有聲黌序孫應璧登己卯賢書氏猶及見之

壽八十知縣旌其門曰貞操餘慶

何氏懷集人莫亭宗妻年十七適莫甫一載而亭宗歿有遺腹子炫霍氏上奉孀姑下撫弱子家貧惟一婢種芋代餐姑壽至八十餘炫霍遊庠序氏卒年七十有四知縣李盤旌其門曰節炳懷陽

潘氏容縣潘泓女封仁廉妻年二十五夫死守節操擬冰霜萬厯三十年遇例勘舉三院交揚登節婦錄



鄧氏宣化生員朱璵妻蔣氏宣化生員張義妻李氏宣化民劉璋妻夫亡皆青年守節郡守方胥旌表其門焉

錢氏橫州人歸永淳廩生張子麟為繼室時年十八踰二年子麟卒氏撫孤應斗課以讀書尋入泮壽六十卒萬曆四十二年知縣童時明詳請具題建坊旌表并為立傳

譚氏興業人何震妻年十九震卒欲以死殉不可

得矢志不再適孝事舅姑白首完節鄉評重之先  
後直指兩旌其門卹以金帛天啓二年奉詔建坊  
旌表

潘氏隆安人黎善明妻年十六適善明止生一女  
善明卒氏年二十八家貧茹苦日織以供衣食人  
常諷以改行號泣拒之守節四十四年而終

黃氏隆安人李秀款妻生子二氏年二十有五秀  
款病卒家徒壁立衣食常不周長子又卒撫育次

孤成立壽六十有九

李氏桂平人周節妻節死無子氏事公姑盡孝潔操自勵郭叅戎聞其色麗欲娶之毀容以拒年二十守節至五十四而終事上撫軍嘉獎

鄒氏馬平人許聘莫姓未嫁夫卒親欲奪其志不從遂服莫之聘衣自縊

計氏馬平人適副使王化化先令平遠以家寄會昌會田坑賊起化督兵勦賊大敗賊於黃沙賊懼

遣間至會昌詐謂化亡氏聞而信之即沐浴更衣以六歲子納妾懷中遂自刎賜有坊祠

計氏馬平人王化妻之女姪適戶部主事陳原道夫歿觸棺求死遂不食逾二日卒孫司徒上其事賜坊祠旌獎

董氏馬平人俞璇妻年二十六守節育子暨孫壽六十三卒有節撫兩世坊

蔣氏灌陽人年十九適庠生唐東昇生子照纔三

月東昇卒氏矢志守節毀粧服躬操井曰奉養舅  
姑延師訓子課讀常達旦後照登賢書以名宦著  
天啟五年伏闕陳情詔旌其門曰貞節

歐陽氏威州守歐陽經女適平樂郡庠生莫希夔  
希夔死氏方二十一歲孝事繼姑郡孝廉慕其賢  
以聘禮進氏怫然盡擲之堅志若守繼姑終所餘  
產屋盡為族人侵占氏結茅以棲紡績自活茹荼  
幾六十年乃終

蔣氏賀縣蔣悅女年十六歸於吳僎生子勉仁夫  
卒氏年二十一矢節撫子以完節終院司表獎

黃氏荔浦縣哨軍黃銳女適劉鸞劉早逝氏年二  
十五撫幼孤誓不改適有無賴子戲之氏厲聲曰  
汝能保而之不死乎汝死欲人之淫而妻乎撫膺  
大慟其人愧而逸去壽七十八乃終

覃氏博白人李日新妻日新歿氏年二十二矢志  
自守遺孤甫週歲撫育成立奉題建坊

胡氏北流人麗穆妻年二十七而寡撫子省身年甫七歲及長娶媳李氏未數載省身復夭李年二十五與姑共矢栢舟撫二孤紡績自給教之讀書知縣楊林芳具額旌獎

李氏昭平人世襲土巡檢龍在淵妻年二十六在淵亡子象乾甫四齡家業蕭然親族有欲奪其志者氏輒拒曰妾良人雖微末土官亦受一命之榮其妻豈肯再醮乎矢死栢舟撫孤象乾長襲職家

世復振氏終天啓壬戌年五十有三

盧氏馬平人教諭唐良傑妻文耀母也明末文耀奉旨撫賊被執後賊破城氏罵賊投池死

王氏春始祖姑柳城王士魁女未字因土寇作亂同服斷腸草以死

李氏馬平人許聘朱純未嫁而夫亡氏以處女守節至五十六歲終

計氏馬平人鄭良棟妻年二十六良棟卒甘貧守



節撫遺孤永祚為娶吳氏永祚卒吳亦守節值姑病割股以奉一門節孝

謝氏淑端全州人龍安太守謝天命女適庠生滕愈淞年二十二明末為亂兵所執不受辱携二子一女投昭平江中

周氏全州人儒士曹學禹妻年十八夫亡矢志守節壽八十五崇禎七年奉旨旌其貞節

唐氏全州人舉人蔣拯世妻已酉舉人鵬之母明

李變胤為郝賊所掠當渡河賊挾氏馬上同渡氏躍入河賊隨入氏顧賊所佩刀奪以自刎不受賊汚死

彭氏臨桂人關輔宗妻夫亡氏二十歲家甚貧姑老子幼氏誓守節勤女工以贍養姑病割股煮粥以進姑遂愈撫其子讀書成立崇禎十二年題准建坊旌曰節孝無雙壽九十八無疾而終

湯氏馬平人庠生莫弛妻年十六適莫十八歲夫

亡撫遺腹子睿以明經任推官壽八十有五崇禎  
中建坊旌表

伍氏全州人蔣維蕃妻夫卒氏青年守節且值寇  
亂流離顛沛中皆拒侮守志撫孤成立年六十八  
卒

周氏恭城周裔輔女適費循規夫死氏方二十哀  
慟欲以死相從姑暨母勸曰若如此其如五十日  
之孤何始強起飲食孝翁姑和丸課子苦節三十

年終子而章領丙子鄉薦孫如天登

國朝順治庚子科鄉薦達天順治丙申恩貢

常氏恭城常有文女年十八適周興璽越六年夫卒生一女舅姑憐其少強之改適氏不從堅志守節孝事舅姑撫幼女四十年內外無間言

譚氏女名顯姑懷集人值山寇刦掠一家避難女年十七有姿色私言於嫂曰我斷不受賊辱有死而已嫂慰之愈涕淚過石橋乘空跳下寇見死矣

携嫂去未幾家人贖嫂回詳言其死狀尋屍得之  
女本農家子不知書天性節烈有如此

梁氏懷集生員梁敏女嫁李洪嗣事姑孝會賊破  
寨氏被擄寇携之行氏曰我父祖詩書禮義之家  
豈從爾賊求生乎大罵不屈賊怒甚將殺之氏伸  
頭迎刃曰予得死所矣邑人咸稱其烈

梁氏陸川人生員龐維甸妻鬱林梁景朱女也年  
十九夫偶誓志守節繼母張氏逼嫁不從服毒死

有死節行狀

蕭氏北流入黃紹遜妻年二十三守寡撫訓孤子  
煥遊泮早逝煥婦黎氏與姑共矢栢舟

宋氏宣化人鄧遵素妻年二十七避亂羅陽土縣  
遵素先出城賊勢漸逼氏度夫必為賊害及城破  
嚼舌而死後三日遵素歸瘞之顏色如生

夏氏橫州夏曰校女適指揮弟錢象龍生子有自  
甫三歲象龍卒氏撫孤子成立為娶媳黃氏無何

有自又卒遺一子姑媳孀居撫孤孫萬厯中承襲  
指揮崇禎元年道府旌額曰姑媳雙貞

蕭氏宣化蕭尚書雲舉女適隆安舉人馬之騶之  
騶亡氏年二十六無子自備衾棺絕食七日死於  
夫柩旁鄉人聞之流涕詔賜旌曰貞篤

谷氏隆安人陳肇幹妻年二十六夫死守節壽至  
百歲無病而終

吳氏賓州人庠生謝應軫妻應軫亡無子氏堅志

守節孝事舅姑崇禎三年巡按請建坊旌其門

余氏馬平人徐保泰之母也年二十四夫死侍姑

曹氏守節六十三歲崇禎中賜有雙節坊

廖氏馬平人庠生葛若愚妻崇禎末土賊破城氏  
被掠投河死

王氏馬平人孫章林妻明末夫婦俱為兵執夫被  
殺氏即抱子投河死

鄔氏馬平人龍偕熊妻明末避亂雷村獐佃作叛



偕熊投潭死氏聞之亦投潭死

秦氏馬平生員秦聘瑜女年十五歲明末為亂兵擄及渡河罵賊投水死

戴氏馬平人庠生計于京妻丁亥避亂居五都鳳山村于京被叛丁所殺氏亦持鑣刀自刎死

何氏灌陽人廩生蔣學典之妻生三子長維藻娶唐氏季維薦娶廖氏值兵亂逃散氏偕李媳廖至拱橋頭見兵追之急呼曰婦人義不辱緩則難免

廖曰死吾志也惟姑是從遂相投水中其長媳唐走長頭山兵將近以首觸樹不死兵執之詈罵不屈兵怒斷其右臂而死明日得唐尸於樹下氏與廖之存亡不知也後里中被擄者歸言其事維藻痛極哭於橋二尸並出顏面如生時稱一門三烈縣志唐氏世燾女謂與維藻俱被擄唐死橋下維藻亦就溺者

鄧氏妹全州人兄廩維有二妹一適灌陽庠生唐

納俞一適庠生唐之夔明末被亂兵所擄閉之倉  
中後驅衆婦行鄧氏二人誓不與偕相持慟哭罵  
詈投崖下兵怒揮刀兩刃之

趙氏全州人幼字於蔣夫亡守志兩院旌其貞

彭氏臨桂人梁萬鍾妻年二十二萬鍾卒子宗晉

方三歲氏訓迪有道常泣謂曰梁氏四世單傳吾

不即死者以汝故也汝其勉之後宗晉領癸酉鄉

薦氏年七十有八

鄧氏宜山人頗能詩嫁為同邑吳某妻吳以罪被  
逮氏以衣寄之而侑以一絕云欲寄寒衣上帝都  
連宵裁剪眼模糊可憐寬窄無人試淚逐西風灑  
去途又題畫菊云良工妙手恁安排筆底移來紙  
上栽葉綠花黃長自媚等閒不許蝶蜂來苦志守  
貞以歿

卜氏瓊海人張子翼妻子翼為陸川令會分校入  
闈流冠犯城氏躬率哨兵分布守禦城陷賊衆擁

人衙氏登樓罵賊援兵不至墜樓而死藁葬於萬丈坡

國朝雍正三年知縣謝錫侯修其墓并作記以旌之  
莫氏昭平莫若德長女歸府庠生廖梗梗卒氏年  
二十三矢志勵節茹苦食貧撫孤成立至五十四  
歲終

林氏隆安林正康女生員趙祖鉉妻年二十二夫  
亡無子誓不再適縣尹屢給匾旌揚年七十有五

終

黃氏隆安鄉官黃守正孫女生員郭之棟妻年二十四夫亡孀居無子抱辛含苦志操不渝壽七十有七

譚氏閭氏昭平人黃詮黃聰妻詮兄弟早喪二婦年皆少並誓守節親紉績以營喪葬事正靜持家閨箴完潔詮子長文亦亡撫孫克嗣明經黃鐘其曾孫也

鄧氏灌陽人庠生唐允隆妻年二十一允隆死于  
祔任方四十日氏哀慟幾不欲生既而曰妾不惜  
死其如呱呱何唐氏之鬼未可餒也為營祭葬如  
禮兒漸長出就外傳夜歸必焚膏督誦躬織紵課  
家僮力耕祔任補弟子員氏年七十有九兩院疏  
題旌獎

梁氏姊妹柳城人梁世耀女長年十九次年十七  
俱未適人五都冠粹至刼二女艷其姿欲污之二

女怒罵曰賊奴暴虐鄉里乃大豕不若也吾寧為  
汝辱耶奮起觸石死賊退顏色如生世燿殮葬於  
古帶坪邑人為立雙烈碑表之

鄧氏全州舉人鄧一鼎女適灌陽廩生時正煜未  
十年煜卒遺三子長甫八歲兩弟皆襁褓時流寇  
氛熾粵兵四出無寧日且歲數大歉氏拮据家計  
保撫諸孤皆得成立

國朝康熙辛酉子樞登賢書氏年八十猶健飯巡撫



題請旌表

董氏宜山人舉人余猶龍妻猶龍卒遺二孤俱幼  
氏矢志守節食貧訓子數十年人無間言卒年六  
十有五子心孺

國朝康熙辛酉舉於鄉

趙氏臨桂人周之卿妻子命新甫五歲之卿病篤  
謂氏曰吾病殆莫能興雖親老子幼有叔可棲汝  
年少家貧宜改適氏曰吾聞女不二夫倘不幸當

守子以繼祀未幾之卿卒氏年二十三慟絕復甦  
事舅姑撫孤子咸盡婦道克見其孫補弟子員壽  
八十有一

黎氏靈川人趙元傑妻元傑死氏年二十哀毀欲  
絕隣媪慰之氏曰使有子可以無死今孑然一身  
何為也待營葬畢遂自縊里人憐之

張氏梧州所千戶王大坤妻年二十五夫死無子  
同官指揮百戶知其賢欲聘之強委禽焉氏矢志

不從寡居四十八年淡泊自甘始終如一日壽七十三而卒

嚴氏岑溪人廩生梁觀政妻年二十八夫卒號慟殞絕救之得甦復引繩自縊姑慰之曰吾子已亡老身恃以生者若也若苟死老身不足惜二孤誰撫奈宗祀何慰之再三始勉從家甚貧日親井臼夜勤紡績教二子讀書有成時有太學生求為繼室使人餽之氏叱之曰爾以死迫我耶人見其志

確不可犯乃止苦節終身巡按涂宗濬旌異之

鄧氏岑溪人節婦嚴氏仲子梁葵妻也年二十四夫卒誓不再醮苦節自甘鄉閭有年少失偶者求為匹斥不從年踰六十有司具狀匾其門曰雙節吳氏貴縣人適湯時用八月夫喪守節事姑終其身邑人撰文表墓

傅氏貴縣人未嫁夫喪矢志堅守居父母兄弟家終其世有司聞之特加優獎

孫氏平樂人唐鍾祚妻明季鍾祚死於流賊之難  
氏偕妾馬氏突入賊中收屍被執欲污之氏曰吾  
夫為地方正言諫汝反遭汝殺吾寧同夫死不受  
汝辱也賊怒二氏死之

龍氏融縣人吳振元妻明末潛踪寺厄巖土弁龍  
韜標龔瑞擄氏至棠陰橋抱女投水死其夫聞之  
不食而死妻死夫亡節義相匹聞者太息

王氏全州人壬午舉人鄧元禧妻明末為亂兵所

困不受屈辱厲罵剪髮自縊而死

童氏臨桂人征蠻將軍童葵午女年十四適舉人  
張五衡相夫早歲成名生子二長賡明甫六歲次  
襄明甫二歲五衡病卒氏年二十二矢志守節撫  
子成立伯仲俱補弟子員崇禎間巡撫于元熠觀  
察井濟嘉其操旌曰汎栢孤貞年七十終

張氏臨桂人倖秉澹妻舉人張五衡女性靜慧通  
內則列女傳諸書年十三歸秉澹秉澹領庚午鄉

薦任江西臨江司李氏因已無所出先嘗勸納妾至是秉澹娶李氏生一子名養聖尚在襁褓秉澹卒氏躬自鞠育保愛甚謹時明末兵荒浮至氏拮据家計延師課子為邑庠生娶婦陳氏生孫自甫甫二歲養聖復殂陳年二十一亦矢志不二

國朝康熙二十一年自申補弟子員氏語之曰汝祖早逝汝父復夭吾辛苦半生今得汝成立可以對汝祖父於地下矣年七十九無病而終

何氏平樂廩生何遵女許配劉氏未嫁而夫亡氏甫十六竟詣夫家朝夕奠食葬事畢歸家誓不更適年五十鄉閭公舉奏聞旌表給與米帛至七十巡按田用坤匾其門曰流芳不字又每年加米二石布二疋壽八十四終

鄧氏懷集人生員梁昌御妻年二十四夫死守節撫孤艱苦備嘗幸得成立年五十七而歿


水中二烈女興安人崇禎末其地遭大水死者甚



衆有結筏自救者隣里多附之忽聞波中呼救聲  
漸近見二女子附一朽木條浮條沒引筏救之年  
皆十六七問其姓氏不答二女見筏上男子有裸  
者嘆曰吾姊妹倚木不死冀有善地可存也今若  
此何用生為攜手躍入波中死

趙氏崇善人百戶魏蘭妻蘭死氏年二十餘子龍  
甫數歲氏日勤紡績撫孤長成為之婚娶襲父職  
孀居四十餘年以完節終

蔣氏臨桂人朱紫震妻夫病危篤氏朝夕祈禱願  
以身代年二十九夫亡夫志守節事姑教子克全  
夫志壽八十九猶康健



廣西通志卷八十八